

Wilhelm, by der gratie Godts Prince van Orangiën, grave van Nasfau, van Catzenellenbogen, van Vianden, van Dietz, van Leerdamme etc., heere ende baron van Breda, van Dieft, van Grimbergen, van Arlay, van Nozeroy, etc., borchgrave van Antwerpen ende van Befancon, stadthouder ende capiteyn-generael over Hollant, Zeelant, Westvrieslandt ende Utrecht, allen degenen, die dese jegenwoordige sien ofte hooren lesen zullen, faluyt. Doen te wetene, hoe dat wy ter contemplatie ende in regard van den vromen ende getrouwen dienst, die den eersamen, onsen lieven, befunderen Michiel Adolffzoon, ingefeten  
poorter

poorter der stede van Vlisfinghen ons ende de Gemeene Zaecke, zoe int exerceren ende bedienen van het rentmeesteramt van des C<sup>o</sup>. Mats. demeynen mitsgaders van de geannoteerde ende geconfisquiere goederen binnen derzelver stadt van Vlisfinghen ende den omliggenden quartieren mit allen den appendentiën ende dependentiën derzelver als andersins, gedaen ende eenen tijt van omtrent over de vier jaeren bewezen heeft, geoorfaect zijn, denselven Michiel Adolffzoon van wegen des C<sup>o</sup>. Mats. int bedienen van tzelve officie zyne leven lanck geduerende daerinne te continuëren, befunder oyck aenschou nemende op fyne goede nutheyt, bequaemheyt ende daertoe zeer expeert wezende, gevende hem daeromme volcomen macht, autoriteyt ende speciael bevel, omme tvoorscreven officie zynen leven geduerende te exerceren ende te bedienen, de rechten van de C<sup>o</sup>. Mats. demeynen daerinne te bewaren, allen renten, chijnsen ende andere inncomen, soe geestelijcke als waerlijcke, van derzelver stadt ende des daerane cleeft, te maenen, op te bueren, te innen ende te ontfangen, tot betalinge van dyen realicken ende by feyte te constringeren, allen dengenen, dient van noode zijn zal, recepisse van zynen ontfange te geven, dwelck wy hem zynen leven lanck geduerende geauthoriseert hebben ende autoriseren midts desen, willende dat dezelve recepisse genochsamen betalynge strecken zullen, ende voort generalick ende specialick alles te doen, dat een goet ende getrou rentmeester van des voorscreven C<sup>o</sup>. Mats. demeynen ende geannoteerde goederen van Vlisfinghen voorscreven mits daeranne cleeft, schuldich is ende behoort te doene, totten eeren, wedden, prerogatyven, baten, rechten, vryheyden ende emolumenten daertoe staende ende behoorende; waerop ende van hem wel ende deuchdelick int voorscreven offitie te quyten, de voorscreven Michiel Adolffs schuldich ende gehouden wordt, den behoorlick eedt te vernieuwen in handen van die van onzen Rade in Zeelandt, die wy daertoe committeren ende bevelen, dat den voorscreven eedt gedaen zijnde, ende dese by hem geregistreert zijnde, zy den voorscreven Michiel Adolfs stellen ende continuëren zynen leven geduerende in posfessie van den voorscreven ontfanck, ende van dien, mitsgaders van den eeren, wedden, proffytten, baten, rechten, prerogatyven, vryheden ende emolumenten voorscreven, zy ende alle andere justicieren, officieren ende andere, dyent aengaen mogen zal, hem laten ende gedoogen vryelick ende vredelick genieten ende gebruycken, cesferende alle beletten ende wederseggen ter contrarie, want ons ernste meyninge ende begeerte zulcx is. Des toorconden hebben wy deze met onsen name onderteekent ende onsen secreet zegel daeronder aen doen hangen in placcate. Gegeven binnen der stede van Middelburg op den 22<sup>en</sup> dach der maent van Decembre int jaer ons Heeren duuzent vijffhondert tzeventich ende zesfe.